





藥城集卷第二十七

西掖告詞六十一首

林希集賢殿修撰知蘇州

勅具官林希朕歷選多士以備左右侍從之臣股肱  
之良槩出於此爾以文學政事有聞于時擢從右史  
試以書命而行已不靖遽致人言朕不忍棄才尚寵  
以書毀往涖吳俗思慎厥終可

楊傑知潤州

勅具官某京口江浙之會而揚楚方飢仰食隣境朕  
思得良吏通其有無以濟民病爾以冬官屬績用有





聞而欲自詭以治民朕不汝遺其究乃心以底成效  
可

陳安期屯田郎中

勅具官某爾以能選積勞于工正升之文昌以勸勤  
吏矧司空之屬農部爲上爾其益敬厥事以稱朕意  
可

蔡立知鄂州

勅具官某武昌控引江漢勢居上流古爲重地非練  
達政事不以畀之以爾久於治民爲論者所稱朕將  
觀爾干事惟寬而勿弛明而勿苛則予汝嘉可

盛南仲知衡州

勅具官某朕進退天下士大夫不惟其才惟其行  
未有不能正身而能正人者也爾以世族之後嘗爲  
部使者矣而不閉于家厥聲達焉法不可置徃卽南  
服尚克循省可

許中正致仕覃恩改別議大夫

勅具官某朕嗣服之初推恩海宇矧惟耆老之士蚤  
隆止足之風豈無寵嘉以慰鄉黨可

虞肇知鼎州

勅具官某武陵依重湖之深峻據五溪之走集民夷



雜居剽輕易擾惟守以安靖可以言治爾昔以才舉  
爲御史屬官久於牧民宜在此選無煩條教以便遠  
人可

胡田知誠州邢浩知欽州

勅具官某等欽誠爲郡雖有新舊之異而民夷雜處  
不可一以華法治也田自欽易誠其習南越之故矣  
浩自環慶往亦知所以治邊之宜惟寬可以懷遠人  
惟廉可以服殊俗輔以明斷其罔有不濟可依前件

王存磨勘改朝散郎

勅朝廷用人惟其才而考績必以歲月用人惟其才

故政無不修考績必以歲月故官不失緒朕蕪此二  
柄以御羣臣故雖六事之長循寓郎官之秩具官王  
存文雅足以飾吏事靖重足以鎮國俗恬於進退不  
爲利回出入臺省人言無間司馬治兵朕已重其選  
矣有司奏課并欲以報其勞焉可

梁惟簡供備庫使

勅朕惟崇慶日總萬機號令所至澤遍海內况其左  
右侍御之臣朝夕執事之勞而有不被其賜者乎坤  
成之慶國有常憲尚勉忠孝思報其萬一可

張璪光祿大夫資政殿學士知鄆州



勅昔我神考、收擢雋良、真于丞弼、惟茲內史之重、實  
綜萬幾之繁、朕方將圖任舊人、與之裁成庶務、乃者  
總章大享、百辟在廷、時予重臣、獨以病告、不忍賢勞  
之乂、力求補外之安、曲成其私、勉遂所請、具官某、名  
臣之後、風流具存、儒術之英、文史足用、詳練政事、究  
通物情、樽俎可賴、以折衝盤錯、亟觀於游、不輟自西  
臺之要、付以新鄭之雉、加秘殿之寵名、兼進秩之異  
數、使郡縣識朝廷之意、而官吏知卿相之賢、表帥四  
方、朕尚有賴、可

趙君錫太常少卿

勅太常總禮樂之政、兼伯夷后夔之業、平居無事、著  
無所爲、至於郊廟社稷之儀、朝廷上下之分、一有大  
議、罔不責成、昔叔孫通爲東宮傅、以習於園廟、復命  
此職、趙宗儒失不任事、由卿而罷、爲東宮師、用人之  
難、蓋自前世、具官某、篤於孝悌、居家可紀、敏以從政  
臨事不煩、予欲決嫌而明微、蓋有取於靜慎、此官職  
清而事少、亦將便於老成、往服優恩、勉揚厥職、可

劉絢太學博士

勅春秋之廢於今二十年矣、講者不以爲師、而學者  
不以爲弟子、孔氏之遺書而陵遲至是、朕甚閔之、爾



能講誦其說遭棄而不廢蓋將有見於此者夫三傳之義其得之者多矣附以啖趙無蔽於一家庶幾士有考焉可

鄧羲叔主客郎中

勅國有四方賓旅之事則主客掌其享燕餼牽之節其跡數豐殺皆有常度遠人於是觀禮不可以不慎爾既掌其事矣以資當遷其益勉之以稱其職可

林旦侍御史權淮南運副

勅具官某淮甸之民荐罹饑饉乃者詔發倉廩賑吳楚漕以拯其急猶以乏食流徙達於朕聽朕惟救荒

之術行之略盡惟得良使者因事施宜爲若可賴爾由郎官以才任御史習於楊楚之故其爲朕往視之均程薄歛禁暴戢姦無使斯人重被其困可

田待問淮南運判可淮南提刑

勅具官某揚楚春旱秋水民艱於食漸起爲盜遂使州縣犴獄充滿朕愛之未始一日忘也間起爾於山陽守參領漕事今又命爾督眎刑辟徒以爾習其風俗知吏民所疾苦夫察貪暴謹追擾均有無督盜賊此荒政之急也勉勤其職以稱朕意可

陳紘可倉部郎中王古可工部郎中



勅具官某等漢郎官出宰百里今部使者入治諸司其為輕重異矣朕於是考察多士近而觀其不煩遠而觀其不惰庶幾有得以待任使以汝等久於吳越優有善狀故使紘治子廩告治子工其益敬厥事以底成績可

孫升監察御史可殿中待御史

勅具官某朕方共默不言責成於有司正賴耳目之官別白忠邪論辨得失言而中理則予汝嘉不幸而失子不汝咎爾為御史期年於此矣察其所為忠慤不回以次而遷庶盡其用爾其深識朕意知無不言言無不盡安意肆志無悼後害可

李常蔡延慶並轉朝議大夫

勅三考而議黜陟古今所同積日而叙勤勞貴賤無間矧夫內與六官之長外總連帥之權均計大之羸虛司隣邦之動靜歷年應格稽法常遷有司以言朕何敢後具官李常奮由踈遠深自刻修財賦所存綱目其舉具官蔡延慶名臣之後吏治有餘干城四方安靜不擾咸以待從之選而膺股肱之良雖尺寸以遷未彰於異數而命秩之寵差慰於久勞可

徐彥孚澶州通判



勅具官某河徙而西則澶淵非復昔日之舊然國門  
之壯兵屯倉粟猶甲於它郡大臣言爾可用往丞守  
事勉竭才力以安我股肱之名郡可

章惇知揚州

勅樞臣之長出居列郡汝海之地僻在連山邈焉鄉  
黨之遐疑失親庭之便朕方以孝治天下德綏臣鄰  
宜推茂恩俾易近地具官某蚤以文詞中選拔出於  
衆人中以功名自期被遇於先帝逮予纂服亦既期  
年比緣議論之差授以方州之寄澹然自守綽有安  
靖之風卧而治民不失緩懷之體眷楊楚之重地據

吳越之通途仰足以分予南顧之憂俛足以慰爾思  
歸之願體朕至意勉於裕民可

邢恕知汝州

勅具官某觀過而知其仁君子與之爾有志於特而  
不知力之不逮以陷於過徐察其中蓋有足矜者臨  
汝古郡民朴而事簡可以自養益務修省不汝終棄  
可

王令圖可都水使者

勅大河西流汎溢千里河朔之民以蒲葦爲生與魚  
鼈同居朕中食而歎思得明習水事之人而與謀之



具官某老於從政才力有餘出入兩河間知其得失  
久矣水官之職爾實宜之楊焉王延世之功朕有望  
焉可

王荀龍知澶州李孝純知棣州

勅具官某等治國如烹小鮮涖官如製美錦以煩手  
烹魚則魚必潰使學者製錦則錦必傷朕知斯民之  
艱難擇人而養之閔閔焉若將不及以爾荀龍典刑  
舊德習於為政以爾孝純家世循吏屢典大邦澶淵  
無棣皆河朔之要擇以付爾其益勉之朝夕無怠以  
深副吾望可依前件

郭遠自致仕起知潞州

勅秦伯復用孟明是以能霸蜀人亟誅馬謖終亦無  
功朕周於用人篤於求舊雖設干羽以懷柔異類而  
聽鞞鼓則無忘將臣豈其舊勲久廢不用具官某蚤  
學弓劍晚通詩書勇而有謀整且能暇威名懾於西  
鄙柄任及於中樞南伐無成嗟伏波之遂棄退居能  
飯知廉頗之未衰擢從解組之餘復寄長民之任過  
而能改豈一青之足云窮當益堅或來功之可冀勉  
於圖報以稱異恩可

何正臣知梓州



續城集 卷二十七  
勅東蜀地嶮而民貧不如西蜀之厚而戎瀘被邊民  
夷雜居安之尤難朕方寬賦役以裕民正疆場以息  
衆連帥之任宜得其人具官某奮自東南擢居侍從  
參議論於臺省布條教於方州比自長沙復臨上黨  
出入既久當識朝廷之心寄任愈隆初無遐邇之異  
務爲安靖以慰遠民可

孫覽河北運副除右司郎官

勅具官某奉使北方治河而備邊任亦重矣以爲未  
足以盡其才也召而寘之都司吾之所以責任爾者  
可見也夫分治六官事無巨細畢陳於前若網存綱  
振之則舉弛則盡廢爾昔旣稱治辦矣勉旣厥心以  
觀來效可

陶世廷

弼孫弼死於順州

邢選

吉子吉各補三班借職死於盜

勅陶世廷等惟乃祖父以身殉職義不旋踵寵爾一  
命賡幾士知忠力之必報可依前件

皇兄令羽磨勘轉遙團

勅具官某考績之法一以歲月爲勞而不以親疎爲  
異爾能靖恭於位積日當遷以環衛之崇而加團結  
之寵益勉忠孝無溢無驕以保祿爵之重可

張輔之入內內侍省磨勘轉內殿承制



勅具官某昔文武之盛其侍御罔匪正人今余近習  
之臣與縉紳之士均遇以法亦無以私恩進者爾以  
久勞當遷往祗厥官使天下知叙法之公無內外之  
異可

范鎮可侍讀太一宮使

勅爲國無強於得人用人莫先於求舊朕歷選賢雋  
至於側微患其德望之未克而典刑之未練舍騏驥  
而不御臨長道以咨嗟昔人病之予何疑者具官某  
文冠多士有楊雄之遺風仕歷三朝守劉向之忠節  
蚤事仁祖首開社稷之言晚說裕後復陳堯舜之道  
自處以義歸不待年身友漁樵已無求於當世名書  
簡冊恍或疑其古人茲予績服之初日思講議之益  
謂白首窮經之樂尚可推以與人而真祠訪道之遊  
足使退而養志勉徇予意毋留所安可

吳師仁可越州司法充杭州教授尹才號州

司戶田述古襄州司法蘇昞邠州司戶

勅進士某等古者舉逸民以懷天下朕以爾等皆以  
行義聞於鄉黨故命之一官試之行事其勉於從政  
以效聲聞之美可依前件

叔諱

先因殺人追官勒停已  
叙今叙右千牛衛將軍



續城集 卷二十七  
勅具官某貴而犯法義不得宥過而知改恩不廢叙  
往服恩命而知義之可畏庶勉於咎可

黃履磨勘改朝請卽

勅漢孝宣帝厲精爲政二千石有治理效輒增秩賜  
金朕追想其風欲見之於事而况積勞之久於法當  
遷者乎具官某頃自禁林出爲方伯推其所學施於  
有政表賢獎善有古人之節考績應格吏以叙聞其  
益勉於裕民無使循吏之賞獨隆於前世可

宋彥圖轉內殿崇班再知歸信容城縣臧定  
國轉西頭供奉官再任縣尉

勅具官某等疆場之吏勇者或以致寇怯者易以納  
侮朕方欲慎守四境以綏靖四夷求勇怯之中而有  
司以爾名聞各仍舊官以增新秩謹修邊政思稱朕  
意可依前件

張利一自真定總管移知代州

勅邊之宿將國之干城處則爲民社之寄欲其不擾  
動則當金鼓之任貴其知變兼是二者實難其人具  
官某世爲將家久習疆事持重有守得將吏之心善  
覘多權知敵國之變廝門極邊審邇徼鬻朕方懷柔  
遠人以寧中國爾其謹守吾圉示之以信而裁之以



義適寬猛之中以稱予意可依前件

壯公岳成都提刑蘇泌利州運判

勅莊公岳等守令賢否朝廷不能自知天下利病吏民不能自言宣吾德澤於下而達民情於上者部使者也朕既選用舊人而去其貪暴詔舉新進而汰其不以實者矣以爾公岳久任刺舉所至稱治以爾泌家世文雅通於吏事益利嶮遠民罹茶鹽苗役之害罷瘵未復朕念之深矣其悉乃心謹察苛吏與民休息毋廢朕命可依前件

內臣馮景

見任文思副使知父以園業獻安仁保古夫人曾得銀帛父亡詐認園地

降一官

勅具官某以欺得罪律既重矣觀望高下情尤不可赦也奪爵一等益務循省以蓋其咎可

胡宗哲遂州張太寧漢州

勅具官胡宗哲等朕惟西南之遠弛鹽利之害議茶權之弊以寬其人矣惟是役法久而未定吏緣為姦人或告病夫因事制宜法不能盡順民施法責在守令宗哲家世公卿習於吏事太寧生長蜀漢知其風俗遂漢名郡皆東西蜀之重地苟能平心正身首治繇事以寬民力則太守之職舉矣可



李挺知唐州

勅具官某異時爲郡清心絜已平政理訟期爲賢太守矣朕方變役法之弊新故紛然民意未定京西俗饘役勞治之尤難以爾嘗試爲郡條教不煩徃宣朕意勤察貪吏使民忘繇事之勤此朕所望於二千石也可

崔全通判延州

勅具官某將帥治邊以軍政爲重至於均賦役平獄訟實倉廩郡丞事也使者以爾才稱徃貳高奴克勤庶事以分帥臣之勞可

王純通判岷州

勅具官某朝廷始復洮岷以其初附闕其憲令吏緣是爲奸政事不舉今其郡縣日益完矣居其官者當以近地爲比爾以選徃其謹守條約毋以遠故廢職可

姚兕磨勘轉東上閣門使

勅具官某爾以勇氣聞於西垂奮身稠人致位通顯夫論功而賞雖如丘山不以爲重考績而遷羞之毫毫有不能得國有常典朕弗敢私勉勤厥官以靖疆場可



丁隲太常博士

勅具官某朕方出滯淹以修庶政舉廉退以靖風俗以爾學存本原聲聞東南一時交遊皆致位通顯而循然自守浮沉管庫將二十年不以爲耻奉常禮樂之地教化所從出也因其職事而施爾舊學朕將觀焉可

常安民大理寺丞

勅具官某吏習於法而不更治民閉於論報而不知爲政朕疑其未能盡法之變也爾以經術進而治縣有聞考課稱最往涖丞事庶幾有補於法可

田子諒湖南運判

勅具官某天下之治緩急相矯常過其中乃者常爲刻覈之政矣其弊也事徒文具而民受其病今予欲以寬治民憂其未流頽弛而莫振推予意而布之州縣部使者之事也公卿言爾才力有餘試之南方寬而不弛察而不苛則予爾嘉可

鄒佶都水監丞陳安民簿

勅具官某等朕旣平政以便民民少安矣而大河以北水不潤下昏墊爲虐故當今之政水事爲急以爾信嘗丞水官練達有素以爾安民屢試民事治辨見



稱其益講求本原以積厥職可

葉康弼知劍州

勅具官某朕銓綜庶工獎勵失職思使中外樂事勸功相勉以治爾昔以選任使者中以事廢盤桓不試普安蜀漢之咽賓旅之會地雜礫衍民艱於食往修厥官以稱恩命可

謝卿材河北運轉使自陝漕徙

勅三路之重一也關中夏秋豐穰羌人款附而河朔大水人民流離北顧之憂於是為急具官某強敏而惠靖重而文風節之厚追配古人踐歷之久號稱循吏今河決西流而堤防未立民樓丘隴而播種未期爾能相壅決之宜通有無之積以寬民力而紓吾憂此朕所以用爾於北方之意也可

蔡卞磨勘朝奉郎

勅朕俾侍從之臣出守四方試之從政以觀其才而有司考課積勞應格國有成法非予所私具官蔡卞奮由文藝久踐臺省欲效才實之美自詭民社之政宣城古郡晉唐名臣臨長其地者風績相望也爾其勉思古人以修條教服我新命以寵吏民可

丁恂少府主簿



勅具官某古者謂少府爲天子私藏朕爲天下夫復何私惟是技巧之工以供禮樂之用爾以吏能掌其典籍法度之事其講明之可依前件

張構再知豐州

勅具官某爾旣嘗爲九原矣知其風俗而習其吏民治之爲易使它吏往雖得賢者要必久而後治也使者旣以爾言勉悉乃心綏我疆事可

呂大郊中書侍郎

勅用人先於求舊爲政莫如守成朕若稽祖宗之遠猷祇敬神考之近事網羅遺放而獎任勲舊崇尚寬

簡而慎守典刑茲予一時股肱之臣率皆三朝髦雋之選圖任之意炳然可知具官某器宇博深才智強敏蚤遇英祖亟聞直諫之言中事裕陵不改忠誠之節翱翔外服所臨有聲綜轄中臺百務咸舉甚和而理處劇不煩朕方欲力行忠厚而患其末流之惰媮追復賦役而惡夫下吏之侵擾思與在位同協厥中徃貳西臺之隆益敦大政之本朕旣開懷以用善士亦誠意以報予其克一心同底于道可

劉華右丞

勅漢御史大夫能任其職則爲丞相近世中執法議



論不撓亦補執政昔我太祖優養正士開受直言時  
則有若包拯張昇之流咸以敢言獲聞大政舊俗已  
遠此風寂寥容悅相承亦棄不用朕追懷先正選建  
忠賢諤諤之聲庶幾前列具官某蚤以御史祇事裕  
陵力陳是非不避權寵十年流落志氣不衰召置臺  
端首開正論進任中司之要屢聞白簡之言風聲凜  
然國是以定朕欲試其行事之實是用付以右轄之  
權治忽所關寄任尤重夫以言責人甚易以義持已  
實難爾其勉之毋使輔政之功不若言事之效可

傳堯俞御史中丞

勅枉直未定決於繩墨之平是非相乘臨以法度之  
士比朕纘服之始羣議紛然實賴耳目之司力陳骨  
鯁之論逮茲閱歲浸以成風然而神明存乎其人衆  
正可以無咎余欲一變至道固須多士以寧具官某  
凜然直諒之風出於豈弟之性蚤爲御史議禮不阿  
中列諫垣言政多悟流落雖久志氣益堅俾還侍於  
燕閒日有聞於禮義執法之任非爾而誰蓋政無舊  
新以便民爲本人無彼此以得賢爲先朕將允執厥  
中爾尚不牽于俗可

張端落致仕依前朝奉卽



勅具官某君子之仕進退無常惟義所在爾昔以強敏之資達於從政由病賜告未老而歸比於恬養之餘復有願仕之意朕方篤於求舊急於用人祇服前官以聽新命可

孟永和轉軍器庫副使兼翰林醫官副使

勅具官某以醫爲職生死係焉不幸而失豈專其罪比更大需其益進厥官俾精術業以答恩命可依前件

蔡卞知江寧府

勅左右近臣入備侍從出典藩服習知朝廷號令之

意灼見吏民情爲之本此朕所以歷試在位而成就人才之道也具官某文華之美發自甲年才力之優見於治郡宣城之政數月而成秣陵之從百里而近旣助予治亦安爾私勉修厥官以答恩寵可

王安禮知揚州

勅淮南天下之重鎮也俗本剽輕習吳楚之舊歲仍水旱有流亡之憂朕深念其民尤慎所付思得朝廷之舊以殿東南之衝具官某吏治有餘儒雅足用昔爲京兆休有治功其發摘姦伏明而不苛其推行惠術寬而中理遂領臺轄以秉國成方先帝屬精求治



續城集 卷二十一  
之秋有大臣進賢退姦之助、又於外服稍易近邦、其  
克爲朕舉荒政以惠民、謹追晉以助治、寬我南顧、康  
此凶年可

林希知宣州

勅具官某爾名在文學之科而才兼政事之選比以  
吳郡生齒蕃衍學者如林假爾才名以重其守而僑  
籍所在重以親嫌飛章自陳懇求易地宣城大藩亦  
東南之要往蒞其治服我異恩可

王祥圭

確山縣尉獲賊二十  
一人除方班殿直

勅具官某盜發鄰境而能率衆攻討殲其徒黨非特

武力之勝抑亦智慮有過人者矣寵以勇爵以為能  
吏之勸可



樂城集卷第二十七

樂城集卷第二十八

西掖告詞六十一首

郊曾通判末寧軍

勅具官某北邊俗淳而士武隣好輯睦日以無事爾  
昔嘗以才任刺舉矣久而不試往貳博野尚勉無怠  
可

叔攷等三十二人並除右班殿直

勅具官某男某等士勤身苦節從事於文武積累歲  
月僅乃祿仕以免於耕勞亦至矣今宗室之子始名  
而官其克孝悌於家忠信於國識吾尊祖敬宗之意



以終保祿位可

王宗孟母

王宗孟南京推官母年九十三封壽昌縣大君

勅具官某母某氏年及耄期而家有壯子非有馴行不能致此福也寵之封邑不吝常典尚俾天下知貴老教孝之意可

胡宗愈吏部侍郎

勅吏部分列三銓而長貳各領其一其為權任重矣天下官吏至於其間長短有度輕重有數而猶患不得其當者吏撓之也朕敷求儁良付之流品意在是矣具官某學術之茂冠於東南操履之固不流世俗

試於封駁任職不阿方今吏員冗溢待次者無筭爾其去番難之吝實滯積之歎毋使吏操其柄而士失其職可

顧臨給事中

勅朕欲網羅天下之士而患知人之難唯有歷試之詳重以旋觀之久雖復堯舜何以尚之具官某撲厚之性出於自然直諒之才可備三益守道安命端靖不回二十餘年晏然一節外督漕事公議惜之維是東臺封駁之司實予萬幾出納之地宜得守法之士以為過舉之虞爾其稽考典常附以經術令有不便



知無不言使天下之人不能指摘而議則爾職舉矣  
可

范子奇司農卿

勅司農之政歸于地官則卿事寡矣然朕觀兩漢之  
士政事如朱邑儒學如鄭眾皆老於此官則前代用  
人蓋不輕矣具官某家世名臣詳練吏事出入中外  
治辦有稱居九卿之列修后稷之政益勉無怠以答  
恩命可

馬默河東運使

勅具官某汾晉之民儉而能勤易以術富比緣兵役

之後瘡痍未復思得靖重愛民之人為朕伺察害政  
之吏以爾博學不勸從政有方文登之民至今頌其  
遺愛彭城之治復能首發巨姦是用輟從大農寬我  
西顧朕於用人無中外之閒爾於報國無終始之殊  
務安邊民以稱朕意可

岑象求利州運判何琬江西運判

勅具官某等朕為官擇人不惟其才之雋良亦因其  
人之便習欲使上下相得所至即安以爾象求學有  
本原持心近厚昔在蜀部遠民宜之以爾琬才力敏  
明為政不擾頃居江左列城賴焉往修鄰道之政無



替已成之效使西南之人雖在遐僻千里之外咸知朝廷愛之之意可依前件

常安民鴻臚丞

勅具官某爾進由儒術舉以民政朕將觀爾於近以信其遠典客之職號為優暇益勉無怠蓋將有考馬可

李詵自軍頭司除知忻州

勅具官某武吏當守四方以干城吾民冗於內服縻以吏事雖有才力智勇無自而見爾世本將家習於武事求試於外朕不汝違夫治兵欲整而治民欲安

能整且安則疆場之事吾無慮矣可

郝亶通判睦州

勅具官某仕官之優莫如鄉國知其吏民之態習其風俗之宜所至而安於治為易矧桐復廬之勝加以才力之優懷組而歸益勉無怠可

李琬太醫丞充中嶽廟令

勅具官某爾久習禁方善救諸苦勉思賦祿之厚益勵好生之心可

王鞏通判揚州

勅具官某爾故相之孫而名臣之子也生於富貴而



篤志於學、勇於議論、而不謀其身、淮南大邦、民病水旱、往貳其事、益試爾才。

劉奉世起居郎孔文仲起居舍人

勅欲治國家、當先得士、頃者人物之評廢、而長育之道微、朕顧瞻周行、惻焉興歎、或盤栢久次而未用、或沈伏下僚而莫知、將以責成治功、折衝遐邇、人不素具、其何賴焉、具官劉奉世家世名臣、才穎秀發、試以治劇、煩而益明、具官孔文仲進以直言、文史足用、責之典禮、守正不回、斯皆一時之雋良、多士之領袖、方欲寘之侍從、益當養其才能、左右史官、號為要地、前

後達者、皆由此途、手刊冊書、足以明狂直之效、密侍殿陛、足以觀進退之詳、益勉自修、以須不次可。

胡宗炎將作少監

勅具官某官、宰都城、責在工正、朕方以恭儉自居、以法度自律、宜得愼靜之吏、以督繕治之功、爾昔居此官、號為任職、往貳其事、無改厥勤、可。

向宗良知衛州

勅具官某士、生於富貴者、常患其懷安佚樂、怠於功名、爾以外戚之懿、求試治民、未惟此心有足嘉歎、衛雖跨河地、實近輔、勉脩爾政、朕將觀焉、可。



郝觀皇太后殿管句文  
字生辰除借職

勅具官某朕恭養隆祐朝夕無違爾久此服勞適當  
誕慶錫爾一命無改厥勤可

曾肇中書舍人

勅朝廷以號令鼓舞四方言之不文行之不遠昔河  
西諸將讀璽書而知天子之聖明河北叛臣聞赦令  
而致武夫之涕泣故朕思得良士俾代予言知民物  
之至情識邦家之大體擇之久矣僅乃得之具官曾  
肇少知為文久益更事家傳父兄之學言有漢唐之  
風汗簡編年手紬金匱執筆紀事密侍丹墀比於簡

牘之餘試以絲綸之作油然不竭煥乎可觀俾即拜  
於西垣將益觀其來效雖文稱蘇李未足以為賢而  
事問高崔庶幾於適用勉於自竭以稱異恩可

邢恕知汝州

勅具官某老吾老以及人之老此朕所以教天下之  
孝也爾比自漢東恩移汝海國有常典中止不行朕  
終念篤老之親宜得便安之養特申前命以慰慈心  
服我異恩益思報稱可

李周陝西運使

勅具官某關中之民勞於征伐而弊於飢饉久矣朕



既為之含垢以和諸戎天維縵思助我豐歲粒米狼  
矣法當歛藏繼出中都之泉以廣窮邊之積猶恐吏  
不時具而民或未寧分吾此憂責在漕吏爾忠厚之  
性見紀於時治辦之才屢試以事往推朕旨去蠹賊  
之害而督備禦之宜使疆場永安而民以無事可

劉淑蘇州胡宗哲宿州

勅具官某等姑蘇之饒冠於吳越符離之災接於徐  
毫因其富庶而待之以法郡乃可治乘其饑饉而濟  
之以惠民亦肯懷苟得其人所至而定以爾淑治郡  
有方吏民不擾以爾宗哲臨事必辦才力有餘往因

其民以立其政使富而不溢貧而不怨以稱朕意可

許彥先知隋州

勅具官某隋於春秋雖號小國然觀其應接鄰敵常  
有賢者今以吾士大夫之多而顧無善人以爲之守  
乎爾蚤有文譽晚習吏治尚無菲薄其民往求所以  
安之可

孫諤大學博士

勅具官某士溺於專門之學而不治諸書不達前世  
施之於事罔焉不知朕甚患之爾博於文史不流不  
固往司講解思所以救其失者可



王佺通判荆南

勅具官某南郡控引江湖商賈之淵而盜賊之會也  
守貳之事於南方為劇爾游官之久才力有聞往贊  
其治益勉毋怠可

韓玠通判河南

勅具官某爾家世公卿當識治體而西南之政俾民  
驚擾達於朕聽往貳西都服我恩命無怠循省可

占城國進奉判官蒲霞辛可保順郎將

勅具官某航海而至奉琛在廷心知禮義之榮身無  
遐邇之異特頒恩命昭示遠人可

劉攽中書舍人

勅士有博學而不文甚文而不達於政者矣朕惟人  
才之難拔士之急凡所擢用惟其所長矧夫名在文  
學之科才兼政事之選釋而不用夫又何求具官某  
能讀墳典而索之書習知漢魏晉唐之故中秉直諫  
發為謀猷方其流落之中益聞豈弟之政比召還於  
冊府將漸寘於近班適以病辭勉從所請汲黯雖安  
於卧治蕭生雅意於本朝養子侍從之華實司號令  
之本惟詳練可以彌縫庶政惟辯博可以鼓舞四方  
爾其勉盡所長朕將觀爾於是可



曹誦遙團知保州

勅具官某惟爾先臣克平吳蜀仁澤之深與江漢無極于今四世子孫盛大時出能者昔漢唐功臣高密汾陽之家傳世赫奕不殞其業予甚嘉之今爾奮於閥閱之中休有搢紳之望練達兵事翼贊西樞屬邊守之須才加使名以爲重予欲不違和好之舊而得嚴整之稱體國承家有望於爾可

王獻可火山軍李昭叙石州

勅具官某等河東邊城俗儉而兵勁吏能守法易以爲治爾等才稱武吏之選家本名將之裔往修厥政以寬治民以嚴御兵思稱朕意可依前件

鄒極江西提刑何琬府芥提刑

勅具官某等朕惟古之聖王不泄邇不忘遠雖在江湖萬里之外眎之如畿甸之間是以並擇才能以察犴獄以爾極出將使指入參郎曹以爾琬比在江淮積有歲月咸能慎所施設紀於吏民夫寬民滯訟苟爲不察雖堂上有不能矚苟爲察之雖遠何患徃祇爾事克慎庶獄以稱朕意可依前件

業溫叟度支郎中

勅具官某朕旣克已裕民凡非法之求罔不罷去而



國之經用率如故初是以思得敏強之臣理財節用以羨補不足爾以儒雅吏術有聞於時其能量入爲出助成地官以濟我邦計可

吳革江西運判

勅具官某江西地薄民貧嶮而好訟頃者有司失計以鹽賦民愁嘆無聊困弊愈甚朕雖已弛其峻密復其故常而瘡痍未平念之未嘗忘也爾以才敏擢守廬陵知其吏民之艱究其本末之變徃佐漕事思所以安而養之以稱朕意可

杜常兵部郎中

勅其官某夏官掌天下兵事而邊防禁旅馬牧之政比皆隸於西樞則事益鮮矣爾以吏能久於其屬於法當遷夫以久習之吏而治益鮮之宜事其無不辦也徃率乃職益勉毋怠可

榮谷道通判鎮戎軍

勅具官某被邊之地政兼兵民武吏以奮其威文吏以治其政凡所以愛民備敵之道至矣爾頃以博學多聞試於奉常出佐疆場勉勤職事益以觀爾可

錢式三班借職

勅具官某國家廣漕東南以實中都爾董其事免於



亡失錫以一命益勉無怠可

翰林醫官陳易簡六人比舊各減三官牽復  
勅具官某等醫如函人皆志於仁不幸失之法不可  
廢而情則可恕爾等奪官既久稍復其舊體予至恩  
益勉毋怠可

李括知洋州

勅具官某益昌諸郡莫如梁洋地通蜀漢之饒俗廉  
秦隴之勁每欲擇守常難其人爾頃爲赤令勤勞茲  
久懷組過家無異鄉國服我恩寵勉恩治民可

張士澄通判定州

勅具官某君子之仕不以高下易其心爾昔以才敏  
嘗奉使指茲予命爾佐中山守往悉乃力益勉於事  
則予汝嘉可

彭次雲吏部郎中

勅具官某以資格用人所以爲公也而賢不肯雜糅  
無以獎勸士大夫朕旣命有司講求其方矣爾爲地  
官屬以才能稱進領銓事其悉心流品思稱朕意可  
章燊吏部馬琬戶部韓宗古司封吳安憲都  
官黃景職方郎官

勅具官某等先帝以禮樂刑政責成於文昌用人之



難非它官比清曹劇部尤重其選惟能試之有漸是  
以用無不宜以爾案按察西南治辦不撓玃典領徒  
隸從容有餘宗古出入臺閣有靖慎之風安憲家世  
公卿有練習之譽景質性端茂學術有聞並稱一時  
之良爲我庶政之助譬如衆輻各致其用然後大車  
得以運行勉悉爾心以稱朕命依可前件

盛儔國子司業

勅具官某先帝肇新辟雍以養多士於茲歷年學者  
雲集師儒之任比益重焉是以增命樂正之官以輔  
司成之教爾以老成端厚久於郎曹往祗厥職勉於

訓勵無使陽城韓愈之流專美於前世可

黃庭堅著作佐郎

勅具官某左右史記言動之詳而宰臣紀時政之要  
以授東觀會而成書然後善惡之實後世得以考焉  
苟非其人何以取信爾孝弟之美著於閨門文史之  
功稱於朋友昔張衡崔駰張華束皙皆以才行久於  
此官朕既思見古人爾尚追配前烈可

陳伺直祕閣知梓州

勅具官某朕憂勞遠人過於畿甸以爲吏之侵漁細  
民者遠則莫見民之呻吟疾苦者遠則莫聞是以選



任守臣惟難惟慎爾以臺閣之舊出臨關陝曾未暮  
歲厥聲茂焉朕惟東蜀郡縣之多思得循吏鎮撫其  
俗進直書閣寵光西南尚無菲薄其民勉修安靖之  
政可

晏知止成都運副秦中梓州運副

勅具官某等蜀嶮而遠民弱而畏吏失其道民始無  
告久而不堪或以生事故朕選任使者必先循良將  
使吏不為暴而民不失職以爾知止賢相之後文雅  
有餘以爾中治術之精前後可紀託以二蜀之重分  
吾千里之憂爾其急吏緩民深體朕意可

游酢太學錄

勅具官某凡有職於成均者皆士之秀也爾以學業  
之茂獲與茲選勉修其行使士大夫有觀焉可

張舜民監察御史

勅具官其御史之官知無不言則朝廷肅時然後言  
則天下信嘉謨嘉猷朕之所急也用人之慎孰先於  
此爾以文行風節見紀於時方召寘石渠而臺以名  
聞往祇厥服使言必有物行必有常以稱朕命可

張績祕書省正字

勅具官某用之則行舍之則藏此孔顏之行而士之



續城集 卷之二十八  
所師法也爾昔以直言進流落不用十有餘年安於  
替默不愠不求今予命爾於東觀將用之也其勉修  
所以行之者以稱朕意可

李執柔司農寺丞

勅具官某大農事歸於地官則丞事益簡然卿寺之  
屬皆吾養材之地也爾家世名臣業履修飭往祗厥  
官無墜先烈可

陳烈落致仕福州教授

勅具官某惟孝友于兄弟是亦為政爾以篤行見紀  
於東南雖老而不試可以無憾朕方欲推爾所為施

於鄉人其起視學校使諸生有所矜式可

龔原國子監丞

勅具官某爾昔以經術教國子矣中以罪廢而士大  
夫高爾之義有司薄爾之過其往涖丞事使  
朝廷用人之周無善不舉可

仲葩遙刺

勅具官某古者宿衛之臣勤勞于內刺舉之吏捍守  
于外蓋官稱其事祿視其功事功既修然後得之今  
朝廷以仁洽親爵秩之施舉從其厚故爾以積年為  
勞考課當遷然非其孝弟恭儉持身有法則亦何以



及此其服我恩命勉於自修使寵祿日至而無滿盈之患以稱朕意可

吳淵西頭供奉官命諤左侍禁

勅具官某等爾以吏事宰府久勤於職懇求補外惟廉且慎可以終荷寵祿可依前件

袁說知博州

勅具官某吏部以格用人嚴銓綜之叙雖有賢者不得獨進故侍政事之臣視其才能資任而以時用之然後法不亂而才不滯爾以吏能見紀歷典劇郡河朔之民方以饑饉為憂徃勤勞徠以弭流亡之患可

閻本太學博士葉濤正

勅具官某等天下之士視成均之所趨向以為風俗朕方患其學術之雜駁而文體之流蕩思得知本務實之士相與正之木才質端厚學有原本濤議論堅正行極純絜其徃帥多士喻以朕意可依前件

宋寶

深澤主簿威之父  
一百歲餘承務郎

勅其祖宗以來以仁率天下肆予士民皆得保其天年爾以行義之厚獨享期頤之福一鄉所重朝所尊禮歲時有束帛之寵巡守有就見之義宜加一命以成子孫祿養之美可



韓忠彥樞密直學士知定州

勅有唐開元之初以儒將守邊靜則詳於治民動則計而後戰邊鄙不竦號稱得人茲予祖宗阜康兆民和諸戎狄垂白之老不見兵革亦惟禮樂之士能收干城之功用人之明豈獨前世具官某元臣之後風力自將拔於周行旋付河間之重入叅法從遂膺宗伯之選世有明德人無間言惟乃顯考嘗以旄節爲中山守寬厚之化浹於斯民整嚴之聲震於鄰國三十餘年故吏遺民猶有存者今予命爾以要職撫寧斯土爾亦益懋乃德視乃先烈使北邊之人知韓氏有子予亦有臣豈不休哉可

劉敏知辰州

勅具官某武陵被邊舊難其守比斥廣沅溪而控扼諸夷實賴茲土爾才堪煩劇累更事任尚能持身潔廉與物安靜以循養斯民懷服異類可

龐希道復翰林醫學

勅具官某爾以醫從仕始以不驗失官終以有勞獲叙功過相除固法之所許也既復爾舊益懋乃術以答恩寵可

克勅仲登並廢勘改正任防禦使



勅唐始以防團領四方之戎事中以刺史持節兼治  
兵民國朝參其舊章因其爵秩以錄親報功恩禮尤  
重以爾具官克勅力行孝弟者於閨門具官仲譽服  
勤詩禮信於朋友皆董司環衛兼領遙州積勞之久  
歲月應格俾正使名之重益隆磐石之宗夫富而能  
約者可以保家貴而知降者可以安職服是恩命思  
予訓言可

蔡確改知安州

勅朕體貌大臣務全終始有善則藩飾褒顯以風勵  
天下有過則遷就諱避以曲全舊恩至於用法蓋不

得已具官某早以才力奮於下寮旋蒙器使致位元  
宰第碩不類貪冒有素而溺於私愛以廢公議曲從  
舉吏之請遂成贖貨之辜其驕奢淫縱之狀理無不  
知而涵養蒙蔽之甚殆非體國致煩言之並作雖欲  
宥而不能默守小邦仍褫舊職徃自循省尚體至恩  
可

呂公孺知秦州

勅秦故重鎮統制西戎乃者肇復河湟邊候浸遠雖  
復號稱近地而實據其本根用人之難與昔無異具  
官某故相之後風流未亡舊德之重出入見紀臨民



有寬厚之美治兵知節制之方偃然長城可託西顧  
朕方包裹兵甲以懷柔異類督厲將帥以完整邊防  
蓋非靖重無以爲安非繕治無以特久祇率朕意勉  
成厥功可

樂城集卷第二十八

樂城集卷第二十九

西掖告詞六十一首

仲鸞等六人磨勘防禦使

勅朕於族屬之尊恩極富貴之奉至其進秩之際必  
由考績之詳蓋所以示出爵之非私勉脩身於在位  
典章之舊朕何敢忘具官仲鸞力行孝恭閨門稱順  
具官仲隗服勤詩禮朋友攸嘉具官仲癸恭儉自將  
有縉紳之度具官仲卿脩飭匪懈號宗黨之良具官  
仲聘信厚之深居有聞望具官仲霜威儀之謹動無  
過尤皆領職遙州分董右衛旣積勞於累歲宜正命



續城集 卷七十九  
於前官尚能以約保家以謙守位服此新命思我訓言可依前件

張之諫知德順軍

勅具官某守土之臣皆欲久於其事矧夫邊吏內撫軍旅之政外御夷狄之情非習其故何以能稱爾以材勇謀略出入邊鄙安定之治綽有合聞是用就易符竹往施舊政蓋所以安靜疆場非徇便爾私也可

寇誦覃恩改朝請大夫

勅具官某朕纘嗣丕業思與士大夫祇奉遺訓同濟于艱難爾久服官政有勞于位登進爵秩非予爾私

亦惟先聖之德澤不泯于下可

郭時亮通判海州

勅具某官朝廷之法無言不酬無德不報爾昔在定武固發姦謀而義不受賞歲月久矣大臣猶以為言東海名郡往貳守事益勉於政將以觀爾可

安宗說知利州

勅具官某益昌之民山居而谷飲控二蜀之要耕桑不足而商賈有餘不得安靖之吏民將有不堪命者爾昔以選用所至有聞不由吏部復與茲郡其益勉於從政以報恩命可



范子奇河北轉運使

勅具官某河決而西汗漫千里聽其西流則堤防未立郡縣受害塘水堙塞導之東徙則功費極大民殫於役水未必聽頃者議論紛紜未知適從人民流散靡所戾止朕中食嘆息思救其患以爾任寄之久才力有餘頃將北漕嘗講茲事是用申錫前命責之成功夫使水不潤下民不宅土則征賦靡弊帑廩耗竭漕事盡廢爾將何以尸此其往悉乃心博謀於衆詳究利害以時上聞朕將考而施之尚勉無忽可

吳安持司農少卿崔公度將作少監

勅具官某等朕用人之廣實惟其材上自公卿之家下迨山澤之雋一有可任不論其世以爾安持賢相之子所見者大歷試煩劇風力有餘以爾公度奮自東南文采自表用之諸寺職業不廢遞加進擢以慰勤勞或勉興九農之功或益修大匠之政朕將考察其實以觀成功可

王兢湖南提刑

勅具官某朕俾士大<sub>夫</sub>入治省曹出按州部非特以寵祿厚其身也內則習知朝廷政事之體外則審察吏民情偽之變踐歷既久獎用亦重爾總督倉庾才



力有聞惟是湖湘之遐民習嶮陋之故犴獄所寄得人則安其尚悉乃心罔以內外之殊而不盡其力可

錢暎知真州

勅具官某五代藩鎮之家惟吳越之後冠冕相屬豈惟朝廷寵綏之厚赤其子孫忠孝之篤楊子重地據江浙之會守土之吏未嘗不選也爾以奉使之勤選領其事治民之餘得以瞻望父祖之故國豈不休哉可

正漸知階州郭逢知德順軍

勅具官某等朕以恩信御夷狄以嚴整治邊鄙常使

我直彼曲彼亂我治庶幾兵民底于安靖凡守邊之吏皆當知朕此意爾等咸以才謀見紀習於疆事往祇厥官肅戒無怠可

蕭士元石州李昭叙忻州李詵隰州

勅具官某等河東諸郡犬牙相錯皆密邇鄰國有兵有民凡與茲選其任惟一爾等咸以謀略才勇所臨治辦或告親嫌許以易地將使吏卒無送迎之苦而邊鄙獲安靖之便各勉於事以稱朕意可

致仕馬克等以登極恩改承奉郎

勅具官某等爾以耆年知止退安丘樊顧子纘服均



需多士進秩之寵隱顯同之徃服異恩以介眉壽可  
燕若濟知東明縣

勅具官某占者大邑必使學者制之矧維畿甸四方  
觀法於此大臣以爾才堪治劇命以東昏耳目所接  
得失可考可無勉哉可

陳向知楚州

勅具官某爾爲部使者薦士失當以致人言朕不忍  
廢付爾山陽淮南之民荐經水旱流亡未復勉修政  
事勞徠安集俾民宜爾以蓋前咎可

士鱣磨勘轉右監門衛大將軍

勅具官某凡予五宗之屬皆有十年之叙勤勞非在  
廷之比而爵祿告庶姓之右所以示親親也爾能孝  
恭內外無怨無惡坐閱歲月以陟門衛苟知以進秩  
爲懼日務克已則寵祿之至何止於是可

黃好謙知濮州

勅具官某爾齒髮雖衰而風力猶在憚於朝謁亟請  
外官朕惟民政之難不惟其力而惟其才俾朕得循  
良以牧養細民俾爾得暇豫以攻治衰疾夫亦何所  
不可濮陽之治尚能勉以圖報可

張脩駕部郎中



勅具官某馬牧之政歸于西樞則司駕之治簡矣以爾才力之優歷使諸部亦既勞止還總車乘政之試於內服益以觀爾可

王瑜京西提刑

勅具官某官宿其業則民安其政方今吏溢于額朕雖欲行之而有所未暇以爾案刑于淮甸歷年之久民無怨言茲復命爾督視許鄧地雖不同而職事如一庶幾練習之故以無曠弛之慮祇朕新命益勉無怠可

康識權發遣鄜州今落權發遣

勅具官某朝廷急於用人故士有以資未應格進攝事者爾以才智足用擢守鄜時歲月既久治辨有聞俾正厥官益思所報可

楊叔儀少府少監守本官致仕

勅具官某陳力就列不能者止古之仕者以之而士大夫有不能者爾起於布衣進貳列卿而能因病告休敦止足之義因其舊秩歸耀鄉黨尚使子弟知所矜式可

融州歸明楊晟該等改右班殿直

勅具官某等爾等獻地築堡披山通道忠孝之心見



于勤瘁不有褒顯孰云旌勸特命進秩列于廷臣祗服異恩永保疆場可

曾肇磨勘改朝散郎

勅士大夫有常秩者皆得以叙進至於近侍之列優以三歲之典非謂從官親近而特私之也進用賢才理有當爾具官某學術精博遣詞甚工操履堅正遇事不苟北司國史煥乎筆削之華進領掖垣確然議論之正有司考績於法當遷稍陟崇階增重要職勉服寵光之厚益思報稱之宜可

蕃官折師武單恩改西頭供奉官

勅具官某朕纘承丕構推恩四海罔有內外咸進爵秩爾世在疆場有守禦之勤服吾異恩勉事忠孝可

郭知章知海州江公著通判陳州

勅某等天下之士非舉無以知其賢非試無以効其實舉之於衆而試之以事此先王所以求賢責實之方後世之所不易也爾等咸以才名薦於近臣朕信而任之使知章守東海使公著佐淮陽勉悉乃心朕將觀爾所爲以知言者之非妄可

黃好謙知潁州

勅具官某汝陰民庶而事繁河通而地勝前後擇守



皆用名流圖謀具存風迹未泯爾才術通敏長於治人出入勤勞又於郎省自求外服以養高年亦何愛於一邦不以成其素志益勉於治以答異恩可

霍唐臣知濠州

勅具官某士奮於布衣為列郡守有民有社可以言政爾積累勤瘁逮茲長人蒙雖小邦而民物之繁山川之勝苟治之有道亦足以觀循良之効矣可

晁端彥吏部郎何洵直司勳郎顏復禮部郎勅具官某等朕慎於用人進必以漸考實已試之効常懼或失其人故使端彥以功籍之明升領右選洵

直以典禮之修進直勳府復以奉常之勤擢佐春官庶幾習焉鮮有敗事爾等其明識朕旨省察茲衷剖決留事以稱吾設官之意可

辛癸太常博士肅宗文光祿丞孔平仲太僕丞勅具官某等朕網羅雋又而分之職事以養其才能苟無曠官有進無退癸儒雅自飾藹然有聞宗文世族之良勤於厥事平仲詞學有本敏於為政皆有已試之效當吾次遷之選夫奉常三禮所在而膳羞開牧朝夕之所有事也其勉悉乃心務舉其職以稱朕意可



續城集 卷二十九  
元者寧館閣校勘換校書郎

勅具官某先帝始復圖書之府並建官屬而收校讎之職爾昔以大臣子篤志學問列於石渠終喪而來官匪其故祇服新命勉思舊學以克嗣世可

梁燾轉朝奉大夫

勅因材任人國之大柄考績進秩吏之常法乃者歷選滯淹試于侍從而有司奏課以時上聞非朕敢私法固當爾具官某早以好學召寘石渠中以嘉猷入事樞府恬於榮利又此盤桓方議禮於秩宗旋納忠於西掖進對一再議論雍容歲月之遷未足為寵大

言大利將有埃焉可

張淳知長垣縣

勅具官某士欲得民而行志莫如為邑毀譽易聞榮辱易及莫如畿甸大臣言汝可辦是邑徃慎為所毋忝知者可

李清臣資政殿學士知河陽

勅朕惟先朝政事之臣與聞玉几之言常奉橋山之禮助我致治行將三年出納萬微日以詳練而乃飛章日乞誠意確然屢却不回執志莫奪止足之懼黽勉而從具官某博學洽聞蚤與直言之對高文密議



中陪禁苑之遊、自登丞轄之司、益著公勸之効、勸於機事、力請近藩、雖大臣體國、不以中外爲心、而朝廷任人、常敦始終之分、三城重地、少假賢勞、祕殿隆名、益旌舊德、尚懷眷予之厚、入告謀猷之嘉、惠安小民、推廣予意、可

張整皇城使廣西鈐轄加遙刺再任以交人理會地界之故

勅具官某桂林諸郡帶山並海控引裔夷比雖少安而備禦之宜常若寇至爾以才勇謀幹入於其地特加遙州之貴仍領兵鈐之重勉圖方略以答恩寵可

醫官元瑞叙權易使

勅具官某爾以方技事上前以不效失官後以有勞進秩特旣當叙而法非其故疑而後予古之道也祇服異恩益勉無怠可

交趾使黎鍾吏外副社英輩東頭供奉官

勅具官某等梯航之勞不憚嶮遠職貢之禮克遵故常特加朝命之榮以爲海邦之耀往服恩寵無廢忠勤可

鄧忠臣祕書省正字

勅具官某爾昔以賦頌之工登圖書之府終喪來見



舊學未忘往祗厥官以卒前業可

成卓

西京左藏庫副使邕州左右江節巡檢差人畫歸化州地圖致農智今乞割峒地與

交趾降兩官  
監錫州酒稅

勅具官某歸化近蕃與吾疆土相接爾為邊吏而致其割地以附益遠夷不任其咎罪當誰執奪爵二等邦有常憲往祗厥官深體寬宥可

仲浹轉正任防禦使

勅朝廷篤於九族之恩許以十載之叙使其賢者有所勸勉而怠者知自修飭祖宗之舊漢唐所無有司奉行敢有加損具官某幼知義訓長事禮文無膏梁

之譏有搢紳之譽久服勞於遠郡茲正命於使聯其克自修以求終譽可

曹評正任防禦使

勅曹氏為將不妄誅戮遠人安之忠厚之報集于子孫自勝衣以上皆高爵重祿而天下不以為過朕甚嘉之具官某幼蒙父祖之慶長有搢紳之譽服事左右勤勞匪懈正名閑禦之任以旌恪恭之懿服我休命毋忝乃祖可

能本降授朝散大夫

勅守器不假疆場之常道啓寵納侮蠻夷之野心謀



續編集 卷二十九  
之不臧終必貽患具官某昔以近侍出守桂林眷歸  
化之近蕃有裔夷之小警不惟分上之素定輒興畫  
界之狂謀舉八縣之故封指三隘而爲境苟幸一時  
之無事遂忘經世之遠圖咎旣莫追罪不可赦奪官  
一等國有常刑思蓋徃愆爾其自訟可

張綬湖南提刑

勅具官某爾昔以常平奉使官廢而罷濟南大藩民  
富而多盜布政期月人亦用乂荆湖之南地遠而多  
嶮民悍而喜訟犴獄之寄惻于予衷徃祗厥官布欽  
慎之意蓋朕之用人惟善所在不以遠近爲異爾其

勉之可

劉當時太僕簿

勅具官某朕敷求雋良選世族之後惟乃顯考昔爲  
嘉祐侍從之冠文學議論有絕倫之聲肆爾仲叔侃  
然自修不忘前人茲予命爾僕臣之佐以修閑牧之  
闕毋荒失朕命以忝乃父可

張寔古尚書省都事出職改朝奉大夫

勅某仕爲大夫出守列郡士之力學行義有白首而  
不能至者矣爾名在中臺勤勞積歲坐而致此朝廷  
之於三省厚矣蓋將自是爲吏民長惟清與慎乃能



終荷斯寵可

陳遊古知沂州

勅具官某沂居齊魯之間周孔之風既遠民悍而喜  
寇法之所以待之者不與它郡等朕甚憐之以爾老  
於從政知吏民之情往求所以安之非徒勝之而已  
也可

周純知虢州朱陽縣

勅某縣令雖輕職要而近民苟得其人事或以濟虞  
詔為朝歌長施設方略使積歲之盜一朝而去今吾  
士大夫之富不愧於古而獨無其人乎聞爾昔討虜

恩折馘執俘幾獲渠師而以誣罔被譴切不時賞今  
商虢之寇依阻為虐往思古人特建功名以效疇昔  
之勇可

宋子儀大理寺丞

勅某用人之明莫如已試崇陽之訟誣執交構更數  
獄吏皆不能祭汝能究其本根而枝葉自舉使冤者  
獲信死者無憾往丞廷尉推行此心要使庶獄皆如  
此而後可可

秦晉國安仁保佑夫人張氏

特封吳楚安仁賢壽夫人

勅朕永懷先帝簪履之遺率皆當今宮掖之貴而况



擁佑聖德夙夜有勞光寵極於一時始終歷於多載  
不有異數何以示恩具官張氏資性淑均值遇明聖  
躬執燥濕之役行兼保傅之賢睹致治於承平誠有  
功於當世封吳與楚實居四海之上游既壽且賢殆  
兼五福之美報號名之盛前後莫倫明發有懷匪以  
爲賜可

彭汝礪右史

勅朝廷以科舉取人甲乙皆侍從之選然而速進有  
浮淺之累歷試得重慎之宜逮茲稍淹士知自養望  
實既備用之不疑具官某蚤以詞章策名第一試之

彈奏臨事不回屢嬰權倖之鋒不爲進退之慮翔翔  
外服黽勉歷年今朕思得忠良之士以紀言動之實  
顛擔在列咸曰汝宜出入禁闈益將察汝所爲長育  
人林亦當識予深意可

王陟臣右司郎中

勅具官某尚書萬幾所在二丞總之至於條目之煩  
郎任其責朕既欲得清流以厭服多士又欲得能吏  
以肅齊庶政爾名臣之後學世其家者以藝文膺上  
第之選頃以強濟爲天官之屬都司之任汝實宜之  
往祇厥官思稱朕命可



王古吏部員外郎

勅具官某晉魏之閒吏部進退天下士而世不以爲嫌今茲以格用人動輒有法苟能清心奉公宜無不治以爾名相之後奉使諸道號稱良能勉佐天官繩留難之吏寬滯積之士以求稱吾意可

張詢浙憲

勅具官某地官掌財賦之出納而辦其登耗爾佐其事累年于茲亦已勞矣吳越之人文巧好利犴獄多有汝長於其鄉而知其情僞往將典憲鉏其豪強而紓其無告以致予欽卹之意可

陝西移四通判

來吳汲光移秦州秦州歸承之移來吳延州崔同移澤州渭州

歸陽成後移延州

勅具官某等朝廷推誠心以待天下之士而祖宗法令之舊有不敢逾茲緣親嫌俾爾易地蓋秦雍延渭均號藩州而兵民政刑皆足爲治勉出爾力以左右元帥毋以東西易其意可

蔡潛除司農簿

抗子

勅某朕惟英邸舊臣淪謝無幾幸而有子亦既能仕其於成就長養宜在朝廷是以擢於稠人命以農屬其尚體予至意克祗厥官以毋墜其世可



令踈

該覃恩持服終喪  
除右千牛衛將軍

勅某朕嗣服之初博推霑澤爾與陳讓真退遭閔凶  
終喪而朝前命不改宜陟環衛之列以均宗黨之榮  
可

張元防權發遣府界提點

勅具官某畿邑之廣官吏之眾不能當諸道亦明矣  
然朝廷置使以糾察其政刑則與諸道比蓋所以詳  
治都鄙而儀刑四方不可不慎也以爾才力之裕習  
於從政往祇厥官務求實效千里之近耳目所及吾  
得以觀爾可

周邠通判壽春

勅具官某鄭復為郡興廢補敗爾與有勤焉壽春之  
富民庶而事叢既以旌爾亦以觀從政之效可

魏瑄

先從韓存安夫官後從劉昌  
祚有勞氣奉議郎熙河機宜

勅具官某爾昔從軍瀘戎以譴奪爵此事西帥以功  
見賞逮茲獲叙并舉前勞往佐戎旃勉以圖報惟爾  
前事可以為懲而後事可以為勸懲勸不忘庶幾可  
以求成功矣可

常安民太常博士

勅具官某禮之正國猶繩墨之於曲直其以止患猶



隄防之於江河雖先王之典布在方冊然神而明之存乎其人以爾學術之通長於議論政事之美載於東南尚能推明舊章以佐卿貳母使繩墨不得其施而隄防敗於微隙勉思職事朕將觀焉可

豐稷工部員外郎

勅具官某周官司空之職曰居四民特地利蓋宮室械器之事不及焉朕方以恭儉自居凡興建百役有所未暇而大河西流水性未得冬官之責莫斯為重以爾性質方厚居官可紀任佐爾長職思其愛以稱朕意可

沈季長少府少監

勅具官某天惟無私故物無不生朕於用人惟其可者從而舉之爾昔以事廢於朝周旋於外久矣朕棄其過而收其所長擢為九卿貳爾亦深識朕意勉修厥職以答休命可

林英大理少卿

勅具官某好生之德洽于民心然後民知不犯有司今朕既省事以安眾棄利以厚民而決獄之煩動以千數豈某聽讞之吏不能推行朕意以至於此哉爾以儒者通於吏道尚能以經術緣飾法律先民有言



與其殺不辜寧失不經朕夙夜庶幾天下之吏能服  
斯訓以助予治矧於廷尉安可不勉可

樂城集卷第二十一

樂城集卷第三十

西掖告詞五十九首

姚勔宗正丞

勅具官某進取之士志於功名不得廉退靖重之人  
以鎮之則往而不返流以成俗朕方博求賢雋以助  
成治道聞爾淡於榮利未老而歸宴居立園稱道不  
亂是以擢丞宗正以風勵天下勉從弓旌之命使士  
大夫知篤行之貴可

林希湖州周之純宣州沈季長秀州

勅具官某等江浙之間山川民物之勝有唐臺省之





士求守其地有不可得者矣今茲士大夫重內而輕外胙之千里之社或缺然不滿其意此豈朕不世邇不忘遠之意哉以邇希蚤與從官文學足用之純昔嘗奉使才幹有聞季長久於滯淹風力不替朕惟吳郡宣城嘉禾三郡之富思得才者付之吏民勉究乃心毋以內外爲高下之意民苟安汝朕不汝遺可

李傑梓州提刑陳鵬運判

勅具官某等東蜀諸郡頃以西南夷之亂輸輓供億民不堪命朕旣寬而養之疲瘵未復而春夏繼旱有艱食之憂是以刺舉之吏其選尤急以爾傑頃參使事久勞于職習知其故以爾鵬生於其鄉長爲之吏詳其得失故使傑察其刑鵬佐其漕朕於遠人所以念之者至矣推予此心各勉於治可

呂陶京西運副上官均比部員外郎

勅具官某等士任言責則無官守以言取人而不試以事朕以爲未也昔漢宣帝以諫大夫通政者補郡國守相而唐世御史與尚書郎相出入也蓋前世之所以用人者至矣今陶由殿中擢與七人之列而均以監察遷爲副端之重其爲朕明是非辨邪正者多矣其以陶刺舉許洛諸郡而以均按計出納諸籍苟



試之以事而人無間言焉則才可見矣可

史宗範知涇州

勅具官某安定雖非極邊而聚糧訓兵為疆場之重所賴者多矣爾歷試諸郡治辦之聲達於朝廷是以召之江無優佚之邦付之金革備禦之地勉修厥政緩懷兵民而撫循將佐以稱予選任之意可

黃慶基鴻臚丞

勅具官某鴻臚之於諸寺號為少事矣然皆朝廷所以長育人材之地未嘗妄授也爾通守南邦蓋未嘗求而選擇自至其克日奮勵使天下信吾用人之公

非苟然而已也可

張峒戶部員外郎錢長卿刑部員外郎

勅具官某等六卿之屬其切於民事者地官制其衣食而秋官治其生死有非其人或受其病以爾峒將漕右輔民不告勞長卿司計中臺事不失統是用以時進之俾佐二部夫職日以高則責日以重惟能以遷為憂而不以為嘉則職事舉矣可

大名府驍武第一指揮都虞候楊政等七人可並左右侍禁

勅具官某等承平既久貔虎之士以歲月為勞坐致



好爵既登仕籍復從吏治惟廉與慎可以安受寵祿  
可

韓維守本官資正殿學士知鄧州

勅朕承祖宗之丕業訪求黎老與共國事矧復裕陵  
藩邸之舊父兄世臣之餘民望所依朕何敢後然而  
華髮在御有賢勞之嗟旅力旣愆以出守爲樂進退  
之際禮義存焉具官某頃以耆艾恬於燕閒召寘邇  
英賴其勸講之助擢居黃闥付以議論之權任寄方  
深歲月未幾惟廊廟有日昊之務而方州存卧治之  
風眷南陽之大邦本故鄉之近地仍還舊職以示往

恩尚俾中外之臣知予終始之意思永終譽克綏厥  
心可

李士京將作丞兼中軍器丞

勅具官某等匠事之不可廢與戎備之不可忘其職  
均耳以親爲嫌法所尚避徃祇新命率職無怠可

劉務誠三班奉職

勅具官某吏自宣猷改隸奉常歲月滋久勤亦至矣  
錫爾好爵勉於廉節以安寵祿可

王衮知衮州

勅具官某吏道以律令爲師然讀其書誦其數而不



知所以行之未足與言治也爾明習三尺出守列郡  
臨長吏民知弛張之方有循良之譽急於親養來請  
鄉邦朕不爾違以勸能吏祇服休命益勉無怠可

馮宗道遙郡刺史

勅朕嚴內外之分飭左右之戒是以近習之臣雖才  
智敏強見於內廷而外無知者具官某蚤蒙器使荐  
經事任出入諸道靖而不煩比緣積勞之久擢參後  
省之祕而重慎祇肅有加於前宜因寄資之崇益以  
閱月之效佩之郡印以寵貂冠勵爾在公清我禁闈  
可

胡田

先以宮苑副使知州  
改為軍除為知軍

勅某沅誠皆南邊新郡而誠之於沅地不能半官吏  
兵丁餽餉勞止比因有司之請易以軍壘之柵爾因  
領舊治以撫遠民均為長吏毋以名號之殊為輕重  
之意可

陳安石知襄州

勅襄陽古都會也山河雄勝居楚越之上游風俗剽  
悍蕪雍洛之餘習在戰國為用武之地方承平為無  
事之國牧守之勝圖謀具在具官某起自世族華髮  
一心試之中外清節可紀比者解印西土持節南陽



坐席未溫捧詔入覲眷荊州之重地方守臣之闕人  
匪爲爾私將適民望勉圖安靜之術思繼循良之風  
可

孫懷用知寧化軍郝逢知岢嵐軍

勅具官某等嵐谷固軍皆樓煩之故地民事雖簡而  
邊政爲重守土之吏必慎所付爾等咸以選任習於  
疆場之政惟恩與信可以附吾民而服隣國勉思訓  
言無怠於事可

王愈光祿丞

勅某政無大小以得人爲重雖復騰羞之未足效才

否之實爾又試於外而來居此勉修厥職毋忝朕命  
可

姚勔秘書丞

勅具官某爾以清節懿行聞於鄉黨公卿譽者交至  
於前乃者擢承宗正實刊玉牒顧惟東觀之重號爲  
衆材之委徃服厥職益懋乃德以稱予待爾之意可

蒲宗閔知興元府史宗範知廬州

勅具官某等漢中蜀之大都而合肥楚之奧壤守臣  
之選不在有可以爾宗閔入治郎曹出將使指以爾  
宗範踐歷藩屏宜於吏民因其已試之效付以共理



續城集 卷三十一 六  
之柄往祇厥服俾二郡之民被豈弟之政以助予治  
可

林顏權知泉州

勅某祿廩之給官有常日爾奉使于外而取逾於法  
以致人言將何以率屬群吏責之廉節乎宜罷所領  
假守方州祇服寬憲修省無怠可

孔平仲大常博士

勅具官某刑政之得失衆人知之然其所興壞止於  
其事而已禮樂之得失視之未必見也而治忽之端  
或自是起故朕於奉常之官擇之必慎用之亦速爾  
以儒術精博吏治通敏以在茲選其克爲朕別嫌明  
微以詔爾長俾上下內外不愆于舊章則爾職舉矣  
可

西蕃首領溫溪心心年欽墮二人並除化外  
州團練

勅具官某等天之於人善惡必報朕上法天道以爵  
命四方有能忠勤必保富貴爾等才雄諸部心奉本  
朝審於禍福之原明於逆順之理團兵寵秩蓋旌守  
節之堅絕等世恩當竣成功之報可

鄭侑知單州



勅某公卿之世有列於朝不患不用而患不立爾名  
臣之後以詞藝自奮入佐卿寺出典藩服由河內領  
單父恩亦厚矣母忝乃祖勉思所以報者可

孫之敏知雍立楊瓌寶知咸平

勅某等畿邑大夫古所謂內諸侯也仰有朝廷俯有  
吏民善惡之妨朝夕可見以爾之敏家世名臣才穎  
自著以爾瓌寶宦學歷歲志節不回誠以鄉遂之民  
將觀政事之實在邦必達爾尚勉之可

許懋右司郎中

勅某萬幾出納萃於中臺詔刺稽停文案壅滯自唐

正觀之盛而患之矣矧今俗弊政煩實倍前世雖上  
有管轄而郎不得人罔與共濟以爾奮自周行亟更  
劇務強敏樂易所至有成是以召自南服還領右部  
尚能體余不決之舉勉盡匪躬之節虛位以竢爾其  
欽哉可

陳軒主客郎中

勅某春官之屬皆郎之清選也爾昔以文藝發身名  
在甲乙中以靖退補外安於遐邇還朝已久素守不  
渝今典祠溢員而司蕃虛位祇服朕命徃勤厥官可

豐稷殿中侍御史



勅具官某孔子稱有德者必有言德之無素而言以爲責則言有失當而聽者惑矣爾昔爲御史不得其言而去出使諸道入居郎曹端良之聲予有聞焉其尚一乃心時以德言來告俾予一人復聽德之助可

陳知晦蔡州簽判

勅具官某五世舊臣百年遺老求之於時蓋無幾矣今其子弟官於四方左右莫與爲養大臣來告惻焉疚懷以爾篤於孝弟服勤無斁雖從事汝南疑於左遷而朝夕之奉實惟汝志可

向宗旦司農少卿

勅具官某司農掌倉庾委積舟楫苑囿之政合以時行視吏卒因其勤惰而正其黜陟蓋亦勞矣異時二卿共事猶或不給今萃于一安得不告勞乎爾以世家之盛兼外戚之寵而仕由科舉官有風迹往爲之少俾羣司競勸衆務咸舉以稱朕命可

侯利建京東漕井亮采河東漕

勅具官某等齊魯之富甲於四方而連歲水旱民艱於食盜賊將起汾晉之貧甚於西邊而逮秋豐成粒米狼戾收歛爲急朕思得良使者以濟二方之宜以爾利建忠節強勁安靖不擾以爾亮采才力敏濟察



舉有夕卓然已試之效庶幾諸道之選往祇厥服使  
民食無匱而邊儲有繼此予所以命汝意也可

馬城湖北憲

勅某爾轉漕汾晉之閒以羨補不足歷年于茲亦既  
勞矣荆楚雖遠而庶獄之治方漕爲簡其克清心慎  
聽使江漢之閒無冤愬之民以荅恩寵可

林積知福州

勅某長樂大藩七閩之冠衣冠之盛甲于東南工商  
之饒利盡山海然以地狹故民多不足俗巧故吏或不  
稱爾既生於其鄉長習爲政歷試列郡服勞諸卿  
今予命爾懷組而歸非獨勸榮於故鄉蓋將責實於  
來効可

朱服擢發遣泉州

勅某爾昔嘗備左右史矣出涖京口于茲在朞朕比  
以常法遷爾長樂而有司言爾事親不謹爲吏不職  
朕方以恕臨物不忍究也清源大府徃爲假守內飭  
孝弟之行外循律令之禁日夜不忘庶免來咎可

林顏知濠州

勅某汝奉使閩越不聞令譽而臨財弗慎以致煩言  
朕因其悔過待以寬憲而公議不置封章繼聞濠雖



小邦有民與社服我恩貸勿忘省循可

令詔以率府率講書授迎直郎

勅某先皇帝厚於宗室勉以為善有能通於經術率  
常試以吏事爾誦習典謨明其義訓往服通籍之寵  
以為維城之勸可

張宙古知登州

勅某文登濱海有邊防之責上出守其地非選不授  
爾服勤南宮以積勞而往勉自修飭無忝明命可

高遵易改知全州

勅某黔南雖遠而任寄為重爾以親往憚於嶮艱改

命清湘以安祿養孝治之篤豈惟爾私可

何琬工部郎中

勅某漢宣帝信賞必罰綜核名實至于技巧工匠器  
械元成之間鮮復能及永維熙寧元豐之政其微見  
於百工之事與漢宣比朕雖繼之以恭儉而至於練  
精之功其可忘之爾歷使諸道吏能有聞入贊冬官  
厲精庶務勉循舊章以毋失其故可

崔公度知潁州

勅某汝陰土沃民穡有魚稻之饒而訟訴之煩亦倍  
它郡守得其人則湖山之勝足以為樂苟非其人狂



獄煩多日不遑給爾蚤以文詞備選更踐吏事亦云  
久矣勉勤政事毋爲頽俗所撓以稱朕命可

黃綬知賓州錢師孟知橫州

勅具官某等嶺南諸郡土曠民稀而密通夷落以疆  
場之政爲重故守土之吏常選於右府以爾綬仕至  
通籍而帥臣任以軍政以爾師孟雖爲勇爵而習於  
文法之治安城寧浦有民有兵其先爲安靖以待外  
侮知予所以命爾之意可

石景畧可宣德郎

勅具官某朝廷因唐之故以六曹寺監綱紀百執事

之治凡祖宗法令之舊合散出入有司有不能知者  
是以分命近臣條析爲書於茲歷年爾與有勞焉功  
雖未究而考應於格舉自縣令寘之通階毋郡邑之  
勞而被斯寵爾其勉之可

范純禮發運副使

勅具官其慶曆名臣莫如文正之賢者朕訪其後人  
寘之於朝如見遺老以爾慎靖而文肅恪而通能世  
其家是以擢於文昌之要付以禮樂之事而乃畏避  
權寵自嫌閔閔東南漕事國用之根本任人之重朝  
廷難之均通有無以實中都非特私請之便實亦當



今之急也可

張汝賢右司郎中

勅某東南都漕出納財賦幾半天下左右都司綜執  
綱紀與聞治要雖有內外之異而用人之慎其選維  
均爾比自文昌出總饋運治辦之稱朕用嘉之還爾  
舊司益勉毋怠以稱朕委寄之重可

韓宗道太府卿朱光庭太常少卿

勅某等西漢之治以九卿為重隋唐以來政在中臺  
則寺監之事蓋無幾矣然至於奉常司府禮樂財賦  
之所在用人之慎初無間焉宗道奮於世族之良練

達政治之要光庭比自諫諍之列出佐綱轄之司而  
皆敦朴自守才力有聞擢居二寺之重益觀歷試之  
效深自勉勵以究成功可

李之純寶文閣直學士知成都府

勅蜀雖嶮遠而民習禮義易與為善難與為非一遇  
循良懷之沒齒少加虐政病不自申昔張詠出守方  
兵革之後撫之以義民欣戴之趙抃奉使方泰侈之  
飾節之以禮民安樂之及其復來吏民驩呼唯恐其  
去得失之效昭然著明具官某性本靖深政實寬厚  
處東南苗役之際簡以易從當西南征伐之衝安而



弗擾遺澤猶在父老知之。是以改重職於西清。付遺  
黎於右蜀。勉因舊治。追繼前人。毋使張趙之賢。獨專  
巴漢之譽。可

廖正一祕書省正字

勅某朕登延雋良策之翰林。爾推言往古。以及當世。  
挺然不回。朕甚嘉之。東觀圖書之府。挾冊考義。游於  
其間者。皆士之選也。爾往講習道藝。長育才幹。敦業  
以待舉。吾於養士亦厚矣。勉於問學。思所以成之。可

劉舜卿加遙郡團練馬軍都虞候

勅朕臨御華夷。不求功伐。本欲屈已以安衆。故務柔

遠而息民。蠶被羸羸。夙號連寇。誘陷思立。得罪先朝。  
置而不誅。冀其改過。乃敢結連西夏。攻圍南川。竊據  
邊城。窺伺便利。天奪其鬼。無復畏忌之心。人嫉其姦。  
思致殄殲之勇。時予良帥集此。膚公具官。某學通詩  
書。才任斧鉞。靜而知變。勇且有謀。至則避其銳鋒。去  
則攻其不備。臨洮堅壘。破不崇朝。講珠長橋。殘於一  
炬。元惡受首。種羗震驚。折馘執俘。恩旣均於諸將。發  
蹤指示。賞不可以逾時。宜錫州團之名。仍遷軍候之  
職。河湟遺種。未忘反側之心。帷幄深謀。當審恩威之  
用。勉思全勝。以究前功。可



游師雄改奉議郎陝西運判賜緋

勅某伐叛柔服朝廷之大義避實擊虛將帥之成筭爾出使西鄙灼知虜情能宣朝論之詳以助元戎之決縛致首惡壞其密謀諸羌震驚邊吏增氣遂以文史之舊與有矛戈之功增秩易章未足為寵奉使將漕益觀厥成予欲戢兵固所望於爾者兵利乘隙豈可以為常哉可

廖正古通判滄州

勅具官某景城負海帶河為一都會養兵備邊仕燕將帥當得才士往為之佐爾昔為小官疾姦除惡以

能名聞祇服寵命勉思所以為報可

龐元英鴻臚少鄉

勅某朕嘉祖宗將相之臣有德于朝有勞于邊訪其後人長育成就以勸勵百辟矧爾風力強濟出入有聞贊導國容職高而事寡茲朕所以追寵先正之意爾往勉之可

張琬知秀州

勅某有司進退多士必以資考為之銓次爾入官雖久而法當為邑擢守嘉禾出於異恩其克臨民以寬勿為苛亟馭吏以嚴勿為姑息思所以答獎用之意



可

曾孝序通判莫州

勅某河決而西北方並塞之地頻年水災民艱於食爾以才選往貳守事其思所以均通有無疏導堙塞使吾邊民免於流徙之患則吾爾嘉可

劉言可內殿崇班

勅某爾章獻外家予生於紈綺而能勉自飭勵以成淑均之行選與宗姻既緣華族特增美秩茲有舊章益務自脩以求終譽可

張岫戶部員外郎改戶部郎中

勅具官某爾既出使近部入贊民曹其為屬任均矣然猶以資考之異別中外之民用人之慎國有常典益勉於事以觀成功可

韓緒等

西賊攻圍鎮戎軍南川寨等處緒等戰守有勞或獲傷中韓緒韓進轉二官楊

吉池評趙等減選各轉一官

勅韓緒等夏戎背恩侵我疆場犬羊之羣遍滿川谷諸將戮力清野以須或斬馘酋豪折其凶氣或堅完壁壘保我烝徒雖矢刃夷傷而忠節彌壯遂使醜類奪氣引兵遁還得不償費無以復令其下論功行賞國有舊章疇其勞能增其爵秩朕既無德不報爾尚



勉於立功可

蕃官党令征攬哥趙令景覃恩改官

勅某等朕嗣守丕業凡在臣庶罔有內外咸欲先之以恩而後責其所報爾等守在蕃服世篤忠勤朕以遠故遺爾增秩賜邑與朝臣比勉以勉以恩寵可

顧臨再授給事中

勅朕歷觀多士惟有實者可以久用而不見其敗若夫無實之人朝爲端良而莫入於邪且官某質重而文不阿世俗比從將漕擢寘東臺封駁之風震竦朝聽旋以河漳之害出使趙魏之衝而直聲在人公議

所惜因其入奏俾復舊司勿改平日之心審察未行之政朕有過舉不憚改爲苟無布於四方害及民物則朕爲有知人之哲爾亦有常德之譽矣可無勉哉可

孔文仲中書舍人

勅政令之出公卿爲朕行之而臺諫爲朕言之方其未行內史舍人得聞其議與其旣行而後言孰與未行而議之哉具官某蚤以直言鋪陳治要流落雖久氣節不衰比自右史遷長諫列朕審聽其言未嘗吐剛茹柔慨然有仲山之節是以擢寘西掖試以代言



夫文墨雍容既爾舊學論思密勿毋替前勞可

張頡待制河湟都運

勅河決累年隄防未立西山諸水汗漫無歸屬此秋  
霖鞠爲汗澤朕比顧之念寤寐不忘雖振廩已行而  
宿麥未廣欲使斯民無艱食流亡之患要在使者有  
愛人惻恒之誠具官某蚤分刺舉之權旋委方州之  
重以勤勞久次之選居出納右部之繁趙魏之憂宜  
任其責農桑之政勉盡所宜特加延閣之華以重外  
臺之寄可



